

Buki conmemorativo a keda entrega na firmantenan y nan famia



ORANJESTAD(AAN): Riba Plaza 18 di maart, number di 2.147 hombernan Arubiano balente, firman-tenan di e peticion pa nos Status Aparte, ta graba den marmar, recordando asina kico e firmanan aki a nifica pa Aruba. Un candela eterno dilanti di e busto di Shon A, ta e simbolo di stimacion cu ta pasa di un generacion pa otro.

E aña aki e celebracion riba Plaza 18 di maart ta den luz di e hecho historico cu a tuma luga 65 aña pasa. Historia y esnan cu ta na bida ainda ta siña nos cu dos aña despues di Segunda Guerra Mundial, algo excepcional a sosode na Aruba. E anhelo di e pueblo, esta pa ta Baas den su mes cas, a haya un otro dimension ora cu bou guia



di Henny Eman sr. y Aristide Wever hombernan mayor di 21 aña a yega hunto pa pone nan firma bou un peticion pa logra e anhelo grandi aki.

E grito pa Separacion tabata zona fuertemente na Aruba y e momento a yega pa haci algo. E tempo a yega cu e deseo di e pueblo aki mester worde a scucha. Den un tempo dificil na unda no

tabatin e medionan di comunicacion cu Aruba tin awe, Shon A Eman a entrega e mocion importante den cua ta pidi pa Separacion na La Reina y Mesa Rondo riba 18 di maart 1948 na Den Haag, Hulanda.

Un mocion cu a worde compaña pa 2.147 firma di hombernan Arubiano. E anhelo di e pueblo di Aruba a



worde scucha.

E otro partnernan den Rino a acepta e mocion. Ta p'esey cu te dia di awe nos ta recorda e fecha memorabel aki celebrando riba 18 di maart nos Himno y Bandera. E lucha cu a inicia na cuminsamento di siglo pasa, e firmanan colecta y e mocion entrega, a forma e fundeshi solido pa na aña 1986 Aruba a celebra pa prome bes su Status Aparte. Sr. Roberto Pablo, presidente di e comision cu a traha riba e buki, a repasa un poco e historia di Aruba su Status Aparte. Tambe el a conta con e buki a worde hinca den otro.

"E trabao pa busca potret y dato di cada un di e firman-tenan tabata un trabao intensivo. Cu ayudo di Archivo Nacional di Aruba y Archivo di Corsou cu a yuda cu potret di e schutternan y door di anoncianan den corant, e comision a logra haya alrededor di 1500 potret".

Pablo a remarca cu e firman-tenan cu ta na bida y famianan di tur firmante tabata esnan cu mas a yuda den busca potret pa e buki conmemorativo aki. E comision ta spera cu pa e di dos edicion di e buki "18 di maart. Comienso di un era nobo" por haya e potretnan cu falta. Dos hoben talento- so a canta canticanan dedica

na Aruba su dia nacional e atardi aki, Priscilla Quant y Steve Geerman, kende ta e ganador den su categoria di e festival 'Un canto di Aruba su Himno y Bandera'.

Prome cu el a cuminsa, Steve, bisti na Shon A Eman, cu masha brio a bisa e publico cu su bisawelo tambe a firma e peticion y cu e ta orguyoso di dje. Como gesto di aprecio Prome Minister Eman a regal'e un ehemplar di e buki special traha pa rindi honor na e firman-tenan, cual ta inclui su bisawelo. E firman-tenan di e tempo ey cu ainda ta na bida y cu tabata presente a haya un ehemplar di e buki cu a keda dedica na nan. E buki compila riba peticion di Prome Minister Mike Eman, ta conta e historia di Status Aparte di Aruba. E gran estadista dr. Mito Croes a haci e trabao estupendo aki. Cada firman- te presente riba Plaza 18 di maart y nan famia a haya un buki. Riba nan peticion Prome Minister Mike Eman, yiu di Shon A Eman y nieto di Henny Eman sr. a firma e buki. E anochi bunita yena cu recuerdonan di antes, di musica suave y di discurs- sonan emocionante, tabata completamente den luz di e firman-tenan cu a percura pa cambia destino di nan pais.